

Siunnersuummut nassuiaatit

Oqaaseqaatit nalinginnaasut.

1. Aallaqqaasiut

Siunnersuutip kalaallisut aamma danskisut oqaasertaasa imminnut naapertuutinnginnerata paasineqarsimanera tunngavigalugu Meeqqat tapersorsorneqarnissaannut Inatsisartut inatsisaat nr. 20, 26. juni 2017-imeersup allanngortinneqarnissaa pillugu Inatsisartut inatsisaat nr. xx xx. xxx 2017-imeersoq saqqummiunneqarpoq.

Siunnersuutikkut siunertarineqarpoq siunnersuutip kalaallisut aamma danskisut oqaasertaasa imminnut naapertuutilernissaat.

Siunnersuut Meeqqat tapersorsorneqarnissaannut Inatsisartut inatsisaat nr. 20, 26. juni 2017-imeersup danskisut oqaasertaanik allannguutitaqanngilaq.

2. Siunnersuummi immikkoortut pingaarnertit

Siunnersuutip qulakkiissavaa aamma erseqqissassavaa, meeqqat inuusuttullu angerlarsimaffiup avataanut inissinneqartut, ukiumut 2-riarlutik tikeraarlutik angalasinnaatitaammata. Siunnersuutittaaq qulakkiissavaa erseqqissarlugulu iliuusissatut pilersaarutip ilai inissiinermut pineqartumut attuumassutillit inissiiffiusumut tunniunneqarnissaat kommunalbestyrelsip kisimiilluni pisussaaffigaa.

Inatsisissatut siunnersuut inatsimmut atuuttumut sanilliullugu	
Oqaasertaliussat atuuttut	Inatsisissatut siunnersuut
	§ 1
	Meeqqat tapersorsorneqarnissaannut Inatsisartut inatsisaanni nr. 20, 26. juni 2017-imeersumi imatut allannguisoqassaaq:
§ 32. Meeraq inuusuttorluunniit suliniuteqareernermi malitseqartitsilluni suliniuteqarfigineqartoq nunagisap avataani angerlarsimaffiup avataanut inissinneqarsimasoq angerlarsimaffimminut ukiumut marloriarluni tikeraarluni angalatinneqarsinnaavoq.	1. § 32, imm. 1, ima oqaasertalerneqassaaq: “ Meeraq imaluunniit inuusuttoq suliniuteqareernermi malitseqartitsilluni suliniuteqarfigineqartoq nunagisap avataani angerlarsimaffiup avataanut inissinneqarsimasoq angerlarsimaffimminut ukiumut marloriarluni tikeraarluni angalasinnaatitaavoq.”
§ 46. Angerlarsimaffiup avataanut inissiinermi inissiiffiusup iliuusissanut pilersaarummik tunineqarnissaa	2. § 46, imm. 5, ima oqaasertalerneqassaaq: ” <i>Imm. 5.</i> Angerlarsimaffiup avataanut inissiinermi iliuusissatut pilersaarutip ilai

kommunalbestyrelsip isumagissavaa.	inissiiffiusumut attuumassutillit tunniunneqarnissaat kommunalbestyrelsip isumagissavaa.”
	§ 2
	Inatsisartut inatsisaat manna ulloq 01. decembari 2017-imi atuutilissaaq.

3. Aningaasaqarnikkut allaffissornikkullu pisortanut kingunerisassat

Siunnersuut pisortanut kinguneqartitsissanngilaq

4. Inuusutissarsiortunut aningaasaqarnikkut allaffissornikkullu kingunerisassat

Siunnersuut aningaasatigut sunnuteqartussaannngilaq.

5. Avatangiisinut, pinngortitamut innuttaasullu peqqissuunissaannut kingunerisassat

Siunnersuut aningaasatigut kinguneqartitsissanngilaq.

6. Innuttaasunut kingunerisassat

Siunnersuut inatsisip siunertaa malillugu nalunaarutip oqaasertaanik naapertuuttunngortitsissaaq, aamma innuttaasup annertunerusumik inatsisitigut illersorneqarnerulernissaanut ilapit-tuutaassaaq. Siunnersuutip qulakkiissavaa meeqqat inuusuttuaqqallu angerlarsimaffiup avataani inissinneqartut ukiumut 2-riarlutik tikeraarlutik angalanissaminnut pisinnaatitaaffeqarnerat. Iliuusissatut pilersaarutip ilai inissiinermut pineqartumut attuumassuteqanngitsut inissiiffiusumut tunniutissallugit kommunalbestyrelse pisussaataaanginneranik erseqqissaanikkut, inatsisartut inatsisaata Inunnik paasissutissanik suliarinnittarnej pillugu inatsisip Kalaallit Nunaannut atuutilersinneqarnera pillugu peqqussutip atuutilersinneqarnera peqqussummut naapertuunnissaa qulakkeernejassartaq.

7. Kingunerisassat pingaarutillit allat

Siunnersuut pingaarutilinnut allanut kinguneqartitsissanngilaq.

8. Oqartussat kattuffiillu il. il. tusarniaaffiginissat

Siunnersuut Aningaasaqarnermut Naalakkersuisoqarfimmum tusarniaassutigineqarnikuunngilaq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

Meeqqat tapersorneqarnissaannut Inatsisartut inatsisaata kalaallisoortaanit § 32, imm. 1-imi oqaasertaliussat siunnersuutikkut naqqinneqarput.

Inatsisartut inatsisaata aallaqqaammut aalajangersakkap oqaasertaasa siunertaanut naapertuuttunngortippaa, innuttaasullu inatsisitigut isumannaatsuunissaannut ilapittuutaavoq. Meeqqat inuusuttullu suliniuteqareermermi malitseqartitsivigineqartut angerlarsimaffiup avataanut inissinneqartut, ukiumut 2-riarlutik angerlarsimaffimminnut tikeraarlutik angalasinnaatitaanerisa erseqqissarneqarneratigut qulakkeerneqarpoq aalajangersakkami ukiumut 2-riarluni tikeraarluni angalasinnaatitaanermik nalilersueqqaartariaqannginnissaq.

Nr. 2-mut

Siunnersuut § 1-imi, nr. 2-p kalaallisuanik naqqiineruvoq, Meeqqat tapersorneqarnissaannut inatsisartut inatsisaanni § 46-mi, imm. 5-ip oqaasertaanut siunnersuutigineqartoq.

Siunnersuut inatsisip siunertaa malillugu inatsisip oqaasertaanik naapertuuttunngortitsissaaq, aamma innuttaasup inatsisitigut illersorneqarnerulernissaanut ilapittuutaassaaq. Iliuusissatut pilersaarutip ilai inissiinermut pineqartumut attuumassuteqanngitsut inissiiffiusumut tunniutissallugit kommunalbestyrelse pisussaatitaannginneranik erseqqissaanikkut, inatsisartut inatsisaata Inunnik paasissutissanik suliarinnittarneq pillugu inatsisip Kalaallit Nunaannut atuutilersinneqarnera pillugu peqqussummi kapitali 4-mut naapertuunnissaa qulakkeerneqassaaq.